

Communicaziun allas medias digl cumegn da Surses (01-2016)

Amprema badigleida pigl project turistic a Savognin igl aton

Tar la votaziun all'urna digls 10 da schaner ò igl cumegn da Surses do gleisch verda pigl hotel e bogn Savognin. Igl project turistic è nia inoltro agl cantun per en sustign da promoziun. Avant tgi vign decidia an moda definivita ò igl team da project da furneir anc diversas actas. La construcziun digl project turistic a Savognin cun en volumen d'investiziuns da passa 100 milliuns francs anc chest aton para pussebel.

Igl sustign digl bogn da divertimaint è da prancepi pussebel alla basa dalla directiva digl Departamaint d'economia publica e fatgs socials davart la promoziun per infrastructuras tgi è impurtantas pigl sistem, tgi è an vigour siva digl 1. da schaner 2016. Ossa è dumando igl team da project ansemen cuagl cumegn. Igl responsabels on da furneir agl uffezi per economia e turissem digl Grischun anc diversas actas, scu per exaimpel la muntada economica digl project per l'antiera regiun. Igl responsabels stuessan pudeir elaborar igls documaints pretandias igls proxims meis. Igl signals positivs èn impurtants er pigls investours. Igl investour principal è an contact regular cuagl team da project ed è anc adegna interesse ve dalla finanziaziun digl project turistic. Ena rasposta definivita è dependenta dalla decisiun digl cantun. **La decisiun davart la promoziun digl project turistic schea an competenzaza dalla regenza.**

Contribuziun communal

Igl cumegn d'urna Surses ò approvo tant la contribuziun unica da 4 milliuns francs ve dall'investiziun digl bogn scu er alla contribuziun annuala da 0.4 milliuns francs ve digls costs da travagl digl bogn. Igl sustign antras igl cumegn è sto cundiziun per tgi er igl cantun Grischun possa conceder ena contribuziun da promoziun.

Amprema badigleida igl aton 2016

Igl travagl digl lai Barnagn pò succeder chesta stad aint igl rom usito. L'amprema badigleida per la realisaziun digl project turistic è planisada tenor igl stand da planisaziun actual segl aton 2016.

Bogn cun hotel e resort da vacanzas

Igl antier project cumpeggia en hotel da 3 steilas superior cun circa 125 tgombras singulas e doblas cun totalmaintg circa 250 letgs e diversas ustareias. Igl bogn da divertimaint cumpeggia divers bogns externs ed interns, en sectour da divertimaint ed ena moderna partiziun da wellness.

Igl resort da vacanzas Viols sa cumpona dad 8 tgesas tgi cumpeglan an tot 96 abitaziuns dad ot standard (standard da 4 steilas) cun circa 400 letgs. La commercialisaziun dallas abitaziuns vign surdo ad ena firma spezialisada ed activa sen plang internaziunal. Resort e hotel furman ena unitad economica.

Ulteriouras infurmaziuns dat igl incumbenso digl team da project, Patric Vincenz.

project management plus

Patric Vincenz
Veia Purmaglera 3
CH-7460 Savognin

tel. +41 (0)79 636 76 04
patric@vincenz.ch